

# KERATAN AKHBAR

TARIKH : 24 SEPTEMBER 2022  
AKHBAR : HARIAN METRO  
MUKA SURAT : 11

## Inflasi Masih Terkawal

# NAIK 3.1% DARI JANUARI HINGGA OGOS INFLASI MASIH TERKAWAL

Bernama  
Kuala Lumpur

**K**adar inflasi negara meningkat 3.1 peratus bagi tempoh Januari hingga Ogos lalu selari dengan jangkaan pasaran sebanyak 3.2 peratus bagi tahun ini, didorong oleh permintaan dalam negara yang kukuh, harga komoditi yang masih tinggi dan gangguan dalam rantaian bekalan global, kata Menteri di Jabatan Perdana Menteri (Ekonomi) Datuk Seri Mustapa Mohamed.

Beliau berkata, bagi Ogos lalu, kadar inflasi negara meningkat sedikit kepada 4.7 peratus berbanding 4.4 peratus pada Julai lalu dan kadar inflasi masih tinggi berikutan fenomena global yang turut dialami oleh kebanyakan negara disebabkan kenaikan input pengeluaran dan harga bahan api.

"Kadar inflasi Malaysia adalah antara yang paling rendah di dunia. Kadar inflasi pada Ogos lalu di Zon Euro adalah 9.1 peratus, Amerika Syarikat pada 8.3 peratus, Thailand pada 7.9 peratus, Filipina pada 6.3 peratus dan Republik Korea mencatatkan 5.7 peratus.

"Kadar inflasi yang lebih rendah di Mala-

ysia adalah hasil daripada langkah kerajaan Keluarga Malaysia untuk menyediakan subsidi yang terbesar dalam sejarah negara," katanya.

Mustapa berkata, kerajaan akan terus mengambil langkah membendung inflasi terutamanya melalui Pasukan Khas Jihad Tangani Inflasi.

"Dengan langkah-langkah yang diambil oleh kerajaan secara berterusan, keadaan inflasi negara secara keseluruhan adalah terkawal," katanya.

Kerajaan melalui Pasukan Khas Jihad Tangani Inflasi mengambil langkah dan inisiatif untuk membendung inflasi serta memastikan rakyat tidak terlalu terbeban dengan kenaikan kos sara hidup, katanya.

Beliau berkata, antara langkah terkini diambil termasuk meneruskan kawalan harga ayam dan telur ayam serta pemberian subsidi pternakan yang dianggarkan sebanyak

RM1.1 billion;

melanjutkan kawalan harga minyak masak sawit tulen kemasan botol satu kilogram (kg), 2 kg, 3kg dan 5kg secara harga siling bergerak berdasarkan harga minyak sawit mentah dunia; serta meneruskan kawalan harga bagi komoditi seperti beras dan gula putih bertapis walaupun harga komoditi tersebut serta harga gas asli merupakan antara faktor kos utama dalam input pengeluaran meningkat.

Mustapa berkata, selain itu kerajaan memberi tumpuan kepada memperkuatkan sekuriti makanan negara.

Unit Perancang Ekonomi, Jabatan Perdana Menteri serta Kementerian Pertanian dan Industri Makanan (Mafi) akan melaksanakan kajian untuk mengenal pasti langkah *quick wins* (penambahbaikan

yang boleh dilihat, mendapat faedah segera dan boleh disampaikan dengan cepat) dalam menangani isu serta cabaran sekuriti makanan negara.

“  
Kadar inflasi  
Malaysia adalah  
antara yang  
paling rendah  
di dunia  
Mustapa

